


申端愍公文集







申端愍公文集

申佳胤著

編主五雲王

編初成集書叢

集文公愍端申

中華民國二十五年十二月初版

著者 申佳胤

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

大

# 申端愍公集目錄

## 卷首

聖諭

諭祭文

褒錄幽忠以勵臣節疏

敬陳所聞以備諮察疏

幽忠可愍伏乞聖恩卹錄疏

懇乞儀卹以普皇仁疏

錄道以助風化疏

禮部覆疏

祭田帖文

## 卷一 奏議

詳陳先著第一議

詳陳先著第二議

魏裔介

王崇簡

周體觀

張王治

魏裔介

詳陳先著第三議

詳陳先著第四議

陳母節疏

挑外河疏

卷二 記 傳 序 行狀 跋

新建廣濟閘碑記

臨洺驛馬政記

侯生傳

永年縣志序

讀史摘要序

鄭儀之制藝序

和九齋新藝自序

孔氏家志後序

贈文林郎杞縣知縣先考阜岩府君行狀

申氏家譜跋

卷末

明史本傳

申節愍公傳

年譜

行狀

欽賜祭田記

申端愍公祀田記

杞縣重建邑侯申端愍公祠堂碑

華亭陳子龍

雞澤殷岳

溧陽馬世俊

新安余維樞

杞縣丁敬

內三院於順治九年十一月十七日辰時。恭奉聖諭。明末寇陷都城。君死社稷。當時文武諸臣中。豈無一二殉君死難者。幽忠難泯。大節可風。著禮部會同院部等衙門堂上官。詳察確訪死節職名。並實蹟具奏。勿遺勿濫。內三院卽行傳知。

維順治十三年閏五月初二日。皇帝遣禮部右侍郎兼內翰林國史院學士李奭棠。諭祭故明太僕寺寺丞申佳允之靈曰。烈士成仁。齋志而沒。忠臣報國。捐軀以從。爾申佳允居心忠孝。秉性端良。值逆寇之憑陵。能舍生而取義。朕追思往蹟。宜表忠魂。特崇祀易名。用垂不朽。靈其不昧。尙克欽承。吏科右給事中臣魏裔介題。爲褒錄幽忠。實聖朝之曠典。謹舉平日所聞。仰塵聖聽。乞發該衙門。再加體訪。以勵臣節事。臣聞運遇昇平。則良臣奏績。時逢板蕩。則烈士腐心。故有刎頸血裾。而酬解衣之遇。焚身滿族。以報國士之知。勁草疾風。表貞心於歲晚。成仁取義。礪砥柱於波流。雖慷慨從容。不必一致。要皆負乾坤之正氣。與日月而爭光。是以上代之君。莫不旌表忠魂。崇重節義。昔武王入商。封比干之墓。明祖定鼎。建余闕之祠。夫比干乃殷室之孤臣。余闕實有元之義士。然而一帝一王。他務未遑。首先嘉尙者。誠以維持風化。振勵紀綱。俾一代之臣子。知所軌範也。自明政失馭。寇焰滔天。龍髯飲恨於鼎湖。坤配遺絃於椒殿。君死社稷。臣罹凶災。誠致命遂志。肝膽塗地之秋也。一時在京諸臣。雖不能策馬揮戈。如瞻尙之死於緜竹。力疾苦戰。若卞壺之死於青溪。然亦有仗節君前。橫屍闕下。金石可勒其貞。松筠不改其色。摧蘭蕙於一朝。流芳聲於千載。斯誠上帝之所矜憫。聖朝之所



嘉歎者也。伏惟我皇上受天之命，奄有方夏。凡所設施，皆足駕軼前代，爲憲後昆。而昨奉上傳闡揚明季之遺忠，振發幽冥之生氣，尤爲化導之先資，敦勵之大典。方之周武王、明太祖，不約而同符矣。以臣所聞，當年寇破都城，殉難而死者，閣部卿寺，則有大學士范景文、左都御史李邦華、戶部尙書倪元璐、兵部右侍郎王家彥、刑部侍郎孟兆祥、副都御史施邦耀、大理寺卿凌義渠、太僕寺寺丞申佳允、詞林臺省，則有翰林院左諭德周鳳翔、右諭德劉理順、宮允馬世奇、簡討汪偉、吏科都給事中吳甘來、御史王章、陳純德、陳良謨、部屬新進，則有吏部員外許直、兵部郎中成德、戶部郎中周之茂、兵部主事金鉉、中書舍人宋天顯、進士孟章明、順天府推官劉有瀾、勳戚中，則有新樂侯劉文炳、惠安伯張慶臻、宣城伯衛時春、駙馬都尉鞏永固、東宮侍衛周鏡、司禮監內臣王之心，斯皆一時殉難之臣，彰明較著者也。伏乞皇上將臣所奏，發下該衙門，再行查訪實蹟，或質之故老之傳聞，或考之同鄉之公揭，訛者正之，遺者補之，儻體訪旣明，卽行題請，宣付史館，浩氣長留於汗青，祀諸鄉賢，芳聲永薦於俎豆，庶積靈未泯，將宣力於興朝，頑懦可風，亦儀型於來禩矣。臣不勝云云。

奉聖旨，著詳訪確查具奏，禮部知道。

內翰林宏文院侍讀學士臣王崇簡奏，爲敬陳所聞，以備諮察事。臣捧讀內院恭奉聖諭云云，欽此。仰見我皇上堯舜之德，嘉意作忠，雖異代之臣，猶惓惓矜憫。臣既有聞於昔日，敢不仰陳於聖時。臣都人也，都城破日，臣以本生母故，營葬城外，潛伏草土，得聞文武殉難者，如東閣大學士范景文、卽

時投井。兵部右侍郎協理戎政王家彥、守德勝門被殺。刑部侍郎孟兆祥、守正陽門死於城下。其子進士孟章明、同妻王氏、縊於其寓。左中允劉理順、妻妾子女家人、闔門死者十二人。河南道御史王章、巡門城上、罵賊被殺。兵部車駕司主事金鉉、巡視皇城、投身御河。母張氏、妾王氏、弟生員金鏞、俱投井死。兵部武庫司主事成德自刎。其母妻妹俱自縊。戶部尙書倪元璐、左都御史李邦華、副都御史施邦耀、大理寺卿凌義渠、左春坊左庶子周鳳翔、左諭德馬世奇、太僕寺丞申佳允、戶科都給事中吳甘來、福建道御史陳純德、文選司員外許直、皆自盡。簡討汪偉、與妻耿氏同縊。四川道御史陳良謨自縊。妾時氏同死。惠安伯張慶臻、闔門自焚。駙馬都尉鞏永固、自焚其室。刎於火中。凡此諸臣、皆一時殉難之烈烈者。考其平生、非彈閣寺、百折不回、卽正直立朝、忠貞夙著。惟其生時犯顏敢諫、所以臨危授命不移。忠魂渺渺、埋沒無聞。恭逢聖朝、鑒及幽冥。臣竊爲諸臣幸之。謹述所聞之最確者如此。此外尙有戚臣焚縊而死、以及隱忍一時、終於盡命者。迨夫宦官庶女、世職青衿、忠憤盡節者。其人雖微、其死同烈。所宜博諮、以仰副聖明勿遺之至意。至於逆闖入關、渡河時、長安縣知縣吳從義、投井死。山西巡撫蔡懋德、大同巡撫衛景瑗、宣府巡撫朱之馮、皆自縊。甯武總兵周遇吉、與賊大戰死。其捐軀殉難、忠烈皆同。乞賜並察、以廣作忠之典。若彼誤國擁貲、掠拷而死者、所當嚴覈、以仰遵皇上勿濫之諭者也。臣感逢聖主、謹陳所聞、以備諮察。字稍踰限、仰乞聖恩矜宥。臣不勝云云。

奉聖旨著詳訪確察具奏禮部知道。

戶科給事中臣周體觀謹奏爲特舉之曠典宜嚴。既核之幽忠可愍。伏乞聖恩卹錄。以光信史事。竊惟湯有天下。顯忠遂良。武王克商。式閔封墓。載在典冊。君臣交美。恭逢我皇上追比湯武。嘉與忠烈。特發上傳。察訪明季殉君死難文武諸臣。給賜褒錄。誠天王明聖。扶植綱常。激發忠孝之大關也。其殉難諸臣。如原任大學士范景文等二十四員。業經部臣屢核真確。盡忠死節是實。然中分四保。以上十五員。列名題請。奉旨褒卹。欽遵在案。其中原任刑部侍郎孟兆祥。並子進士孟章明。大理寺卿凌義渠。太僕寺寺丞申佳允。御史陳純德。文選司員外許直。惠安伯張慶臻。新樂侯劉文炳。宣城伯衛時春等九員。皆以真實。不及四保。未與臣覽諸臣死難實蹟。或父子同盡。或闔門自焚。較之范景文等。尤爲烈烈。其保奏不及四上者。非各衙門見有參差。多緣已經核實。未敢盡疏扶同。竟以三保未沾恩數。伏念皇上愍卹仁恩。特宣天語。詢錄幽忠。在部臣其難其慎。察核再三。以仰副皇上闡揚至意。微猷聖德。傳之史冊。永世無窮。而獨使孟兆祥等殉君死難。屢經部核。幽節旣著。卹典見遺。恐諸臣伏處九原。未得與十五人並留金石。揆之我皇上愍卹初心。當亦有惻然不忍者矣。伏乞勅部准行續錄。則一代大典。傳信無遺。華然之光。垂於百世矣。緣係云云。

奉聖旨禮部知道。

工科給事中臣張王治題爲仰遵明旨。推廣褒忠。敬陳未卹諸臣。懇乞一併勅部議卹。以普皇仁事。

臣見同科副理事官臣陳秉彝爲直陳聞見等事一疏奉聖旨。但察殉難情真。何拘三保四保。許直著確查議奏。該部知道。欽此。臣跪讀之餘。仰見皇上褒忠闡幽。超軼三代。秉彝之所請者。止一許直。而皇上之所推恩者。不止一許直也。在部臣慎重大典。亦止論保之多少。初未別其死之真僞。死果真矣。何論保乎。有保足矣。何論三保四保乎。彼諸臣者。生氣雖存。其骨已朽。聞其子孫。或若敖乏祀。或葛衣行乞。假令死果不真。誰敢冒欺罔之辜。諛此既冷之魄。諸臣中。除許直已奉明旨確查外。如孟兆祥。同其子孟章明。凌義渠。申佳允。陳純德。張慶臻。劉文炳。衛時春等八員。或父子相勸而死。或與妻妾飲泣而死。或燬其著述而死。或闔門自焚而死。皆昭然耳目。毫無假僞。儻不能與四保之范景文等。共沐洪恩。又不能與續請之許直。並邀察議。似與皇上但察殉難情真。何拘三保四保之明綸。終有未確。據實再陳。

兵科都給事中臣魏裔介謹題。爲殉難事同一例。孤臣獨未蒙褒。仰祈勅部再察。准與卹典。以錄遺忠。以助風化事。臣聞忠臣孝子。乃日星河嶽之間氣所生也。有忠臣孝子。則有人倫。有人倫。則天地賴以不壞。故事關道義名節。善無微而不揚。明主褒之。史官紀之。言官陳之。凡以激勸一代之士氣人心。非徒使既沒之幽魂。懷懷生色於九原也。我皇上於順治九年十一月內。特發上傳。著禮部會同院部等衙門。詳訪確察。明末死節職名。如范景文等十五員。孟兆祥等八員。先後俱蒙褒卹。於以扶植綱常。真昭示萬古之懿典哉。諸臣爲不死矣。惟是死難情真。而未經褒錄者。獨遺太僕寺寺丞

申佳允一人臣竊傷之。夫佳允之死也。在甲申三月十九日。而其投井也。則於京師之王公廠。昭昭在人耳目間。豈可假哉。查禮部覆疏。原因太僕寺順天府保送投井身死。而侍讀學士王崇簡之疏。大理寺之保。俱稱縊死。互相參差。是以置之無庸。再議。然佳允係太僕之官。而順天府有地方之任。則其察核。最真最確無疑。未可以自縊之參差。遂使忠魂烈節。鬱鬱於寒泉之下也。伏乞皇上勅下該部。再加察訪。一體褒卹。如以太僕寺順天府與臣所保。俱爲未確。則宜行之直隸督撫學院處。再加察訪。然廣平禮義之鄉。其士大夫相與尸祝。而讚誄之者。則已久矣。臣見皇上昨諭內院。纂修順治大訓。凡忠臣孝子賢人烈女。俱命殫思博採。故敢補牘再陳。儻孤臣姓字。不致淹沒無聞。邀一視之曠典。列法戒之新編。於以表忠勵俗。亦裨益風化之一端也。云云。

奉旨禮部議奏。

禮部題爲殉難事同一例。孤臣獨未蒙褒。仰祈敕部再察。准與卹典。以錄遺忠。以助風化事。祠祭司案呈先該本部題覆兵科都魏裔介題前事。奉旨依後議。魏裔介奏係三月初十日奉旨。爲何至今始覆。本內滿字。魏裔介具奏。奉旨日期。又未寫著明白回奏。欽此。除臣等遵旨回話外。隨於順治十二年八月十六日。行文直隸督撫學院。詳察申佳允死難緣由。去後。又於十月二十三日。行催。今於十一月十二日。准直隸總督李蔭祖咨開。看得永年縣鄉宦。原任太僕寺寺丞申佳允。守義殉難。捐軀允宜褒卹。祇緣行察之異。是以久未蒙恩。茲據道府確查申佳允。委係於三月十九日。衣冠北叩。

投在王公廠井內身死。及察巡撫董天機咨文。並學院程芳朝咨呈內開。道府相同。並無異詞。等因到部。該臣等議得。申佳允當日死節事迹。部院衙門保送參差。未得與卹。今既經直隸督撫等院。詳察當日申佳允死節實迹。委係三月十九日。投井盡節身死。應照范景文等例。一體旌表。奉旨依議。祭田帖文直隸廣平府永年縣。爲欽奉上傳事。蒙戶部咨云。該縣速撥官地十日。每日計地七畝。給殉難申宦家。以作春秋之祭。以昭皇恩嘉卹忠魂至意。該永年縣知縣余維樞。查本縣並無官地。二十八社老人等願輸價買給。蒙撫院董批允。如議施行。今買得府城西南張寨村生員張華然地七十畝。每畝價銀七兩。共銀四百九十兩。俱係二十八社人等。公同捐資。已經丈量交割明白。除申報達部外。卽日撥與申宦家收管耕種。以作春秋致祭之用。申氏子孫。不得擅自典賣撥換。若有勢豪強占。或用價私買者。以背旨論。依律治罪。仍將原地追還本主。其七十畝錢糧。世世照優免例。里社不得妄行攀派差徭。永遠遵守。以昭皇恩於無既。爲此帖付申宦子孫。查照帖文事理。遵守奉行。須至帖者。



# 申端愍公文集卷一

明 永年申佳胤著

## 奏議

### 詳陳先著第一議

吏部文選清吏司主事臣申佳胤奏。爲詳陳先著第一議事。臣疏陳辦賊有急著。有勝著。有先著。而此時最急無如用人。先著卽急著也。制勝惟在儲將。先著卽勝著也。其一曰以諮訪銓司之法。諮訪樞屬。請詳其議。按吏部司官缺出。本部發諮訪單於九卿科道。公舉中行推知才品卓越者。繳單到部。再加確覈。開列正陪。恭候欽點。蓋不啻其難其慎。務得真才而用之也。兵部四司官銓除之法。何獨不然。臣願皇上勅下該部。自今以往。宜照臣部司官例。畿北一人。畿南一人。江北一人。江南一人。山東等十三省。各一二人。每遇缺出。該部發單諮訪。令九卿科道。公舉其雄才大略。曉暢兵機。或敷歷邊方。或曾辦虜寇。英敏甲科。功績顯著者。繳單兵部。移會臣部。列名上請。異日開府建牙。皆從此出。英才濟濟。何事旁求。臣所謂預儲節鉞之選者。此也。伏乞皇上勅部議覆施行。

### 詳陳先著第二議

吏部文選清吏司主事申佳胤奏。爲詳陳先著第二議事。臣疏陳先著第二款曰。以薦舉邊才之法。薦舉



將才請詳其議。前者廷臣薦舉邊才，累牘連篇，滿紙誇詡。若人人韓范，在在孫吳也。及敵至茫然，致興乏才之歎。臣謂文吏作邊才，畢竟非衝鋒陷陣之料也。禦敵之事，全在得將。將將之要，全在遴才。臣願皇上勅下廷臣，宜炤薦舉邊才例，各舉將才，或同桑梓，或係宦遊，或得之傳聞，或得之目見。各舉武弁中之膽略超羣、伎勇絕倫者，彙送兵部堂上官、同職方司、兵科給事中、公同確覈不堪者，卽行糾駁。以應禦侮之需。以備登壇之選。異日邊疆有警，卽可按冊而求。較之白面書生、空談兵事者，不判若霄壤哉。臣所謂專責衝鋒之效者，此也。伏乞皇上勅部議覆施行。

詳陳先著第三議

吏部文選清吏司主事申佳允奏，爲詳陳先著第三議事。臣疏陳先著第三款曰：以保舉守令之法，保舉守把，請詳其議。按保舉守令之法，臣部已奉行矣。近日奉旨，裁置募練，裁通判，置守備，裁州判主簿，置把總，有一番更置，定有一番功效。但守把之官，專司練兵，豈容市井無賴之人，聊以充數乎。臣願皇上勅下兵部，宜炤保舉守令例，令各將領，各舉所知，不拘資格，不拘廢弁，或精於火器，或熟於騎射，或驍勇善戰，或足智曉兵，某堪守備，某堪把總，各舉一二人，卽將實蹟開款，彙送兵部堂上官、同職方武選司官，公同考驗。果堪實用者，請旨填補。不堪者，卽行駁回。仍連坐舉主。兵科都給事中，年終舉劾，以示勸懲。將見兔置之彥，盡入網羅。臣所謂用備干城之求者，此也。伏乞皇上勅部議覆施行。

詳陳先著第四議

吏部文選清吏司主事申佳允奏爲詳陳先著第四議事。臣疏陳先著第四款曰：以甄別京堂之法，甄別大將，請詳其議。按臣部甄別京堂，再三推敲，方得俞旨。今日之大將，何獨不然。夫所謂大將者，必其智勇兼全，韜鈴夙具，遇寇卽能摧鋒，遇敵卽能勇戰。爲三軍表率，爲萬里長城，爲九邊保障者也。若今之遇敵，惟怯不畏法而畏賊，不敢死而怕死，莫得其一弓半矢之用。此以之爲軍卒，且不足。又何以當專閫之寄乎。臣願皇上勅下兵科會同兵部，宜炤甄別京堂例，逐一推敲，斷絕情緣，力爲擔任，將邊腹各總鎮列其實績，悉其生平，堪任者留之，不堪任者去之，分別之中，寓鼓舞之意。臣所謂精提遴汰之衡者，此也。伏乞皇上勅部議覆施行。

### 陳母節疏

吏部文選清吏司主事申佳允奏爲臣母苦節堪憐，臣衷久鬱未展，謹瀝血控陳，懇乞聖鑒。廣孝治之仁，宏錫類之教，特賜旌表，以章婦節，以慰子情事。臣祖籍永年，傳家清白，緜延十世，俱列衣冠。獨臣父化，早年失怙，壯志未酬，孤苦伶仃，終身困阨，年逾六十，尙未有嗣。至六十四歲始生臣，越六年，臣父見背。時臣母軒氏，年甫二十八歲耳。隨臣嫡母邢氏，撫膺長號，相對嗚咽，絕而復甦者再。同心砥節，顧復遺孤，四壁蕭然，篝燈互照。臣年九歲，始入鄉塾，從師受書。閱八年，臣嫡母邢氏又見背，隻影相依，艱苦倍至。臣母以紡織課臣誦讀，溽暑寒宵，咿唔不輟，杵聲四徹。聞者唏噓。臣守嫡母制，十九歲服闋，入邑庠。明秋旋舉於鄉。下第十年，公車四上，至三十歲始成進士。三十年來，臣母荆筭疏布，茹槩飲冰，風雨晦明，淚繼以血。其

生臣鞠臣者。母以代父。其誨臣督臣者。又以母兼師矣。礪冰霜之節。矢松柏之盟。蓋和丸嘗膽。不知歷過幾許酸辛。此臣所以中夜刺心。翹首叩天而無從也。辛未釋褐。彼時卽擬具疏上陳。臣母聞之。力爲戒止。曰。守節。婦人分內事耳。汝未服官。一日。遽爲陳乞。貽我心以不安。非孝也。汝果能黽勉作令。無愧先人清白之遺。異日幸邀封典。榮及所生。爾時再爲上請。亦未爲晚。迨臣筮仕中州。與河災寇患相終始。萬死一生。風波歷盡。中間省刑清獄。潔己愛民。臣母無刻不舉以相訓誡。於甲戌年考滿。乙亥夏。仰荷聖恩。贈臣父化文林郎。如臣官。臣嫡母邢氏。孺人。封臣母軒氏。太孺人。聞命之時。闔家感泣。荏苒七年。俸滿。截考。皇上不以臣爲不肖。欽點銓曹。去年十月。迎臣母至京。承歡菽水。而臣母又因水土不服。抱疴而歸。臣思親念切。夢繞慈闈。近有僕自里中來。臣急詢臣母近狀。僕述臣母形容漸瘦。飲食漸減。思臣之心。視臣更切。臣聞此語。憂心如焚。寸腸欲斷。又以入署未久。功令方新。未敢遽乞假歸。烏烏私情。另疏呼籲。因思臣母一生苦節。不於此時披瀝於君父之前。更將何待乎。伏讀大明會典一款。凡民間寡婦。三十歲以前。夫亡守志。五十歲以後。不改節者。許令旌表。欽此。臣母守節三十餘年。揆之典例。實爲膺合。伏乞皇上特賜旌揚。容臣自備建坊。表厥宅里。不獨臣母子憑藉寵榮。凡天下之爲寡婦孤兒者。皆激勸奮誦。皇上於億萬年矣。臣冒昧控陳。不勝悚息待命之至。

挑外河疏

吏部考功清吏司、署員外郎事、主事臣申佳允奏。爲守城先守關。議築尤當議鑿。謹陳臣郡綢繆之策。仰

祈天語申飭。刻期舉行。以作士紳急公之氣。以壯金湯永賴之基事。臣家廣平府永年縣。幅員雖小。實爲畿南要害之區。日者孤城無恙。固賴守令諸臣捍禦之力。實恃環城一帶水爲之擁衛也。城南五里許有滄陽河一道。發源於磁州。遶邯洛而下。昔年守土者。引之以護城垣。汪洋浩瀚。實亦奇觀。關廂以外。則坦然陸地矣。比來民力以竭。此時而議創築重城。物力難繼。惟有因水之勢。而挑濬之。不傷財。不勞民。庶幾事半功倍耳。臣令杞時。倣舊令宋玟浚池之法。不煩里甲一人。鼓勵鄉紳。合力共舉。至今人猶稱善。臣邑地狹民貧。饑饉洊至。斯時休養。而安集之。猶恐其饑寒迫。而流徙之念生。卽此浚池一事。宜如宋玟與臣治杞之法行之。斷不可派之民間。又增一害也。城以內。計見任鄉紳若而人。在籍鄉紳若而人。殷實舉監宦裔若而人。每人名下田若干。每田一頃。應挑若干丈。務極闊深。宛成天塹。按畝認工。勒期課竣。至若單墜下戶。盡行豁免焉。而此鄉紳舉監人等。誰無父母妻子。誰無身家性命。知必慷慨樂趨。決不忍隔膜坐視也。關廂以外。大隄以內。亦如近垣水勢。一望無涯。異日卽有他虞。附城屹然可恃。關存而城益固。鑿深而築益崇矣。目今凶歲民饑。借此僱工一節。仰而待哺於素封之家。寓賑濟之意於力役之中。利在一時。況近隄之地。不比膏腴。皆斥鹵不便耕種者。漸開之以魚芡葭蒲之獲。利又在後世。自衛之計。人有同心。未雨之圖。刻難緩待。臣雖至愚極陋。願與桑梓諸臣交勸之也。至於固圉保民之策。何以有堅無瑕。輯兵和衆之方。何以有備無患。是在撫按有司。加之意耳。又不但臣郡一塊土。浚池一段事也。統祈皇上。諭施行。臣無任悚息待命之至。



# 申端愍公文集卷二

## 記傳序行狀跋

### 新建廣濟閘碑記

廣平郡誌曰。滏河出神廬山。達海。所經郡縣。皆兩崖高壙。獨入永年界。西起賈葛。東竟東橋。南岸一望平田。而北岸寬。不過數十丈。狹者僅數武。隄削而下。河流曲折東走。若天造地設。藉巨浸資灌溉。號地利焉。成化二十年。郡伯李公。做西門豹遺意。始創利民閘。城南攸賴。嘉靖間高公。斟酌水利。由大慈村鑿隄。砌石引水。灌護駕等村。分浚溝洫。教民秧稻。萬姓便之。後來建閘六道。李公實開始焉。七閘之一曰濟民。地界西閻村隄上。創於嘉靖四十一年之秋。蓋倡自司理石南楊公云。至乙丑之秋。再修之。則適庵李公襄厥事耳。邇暴陳國護等者。於邏城頭建漫河二閘。後來相繼而起。壅水上流。涓滴不下。稻種俱枯。至崇禎十三年。歲大饑。人相食。始剝樹皮。繼食道殣。既有母食子。夫食婦。郊關有以人肉市者。流離在道。死亡相枕藉。士人計無復之。擬引水灌田。以救殘喘。西閻村隄居民李聯芳。擬於濟閘之東百步許。另議建閘。嗟乏資具。予附馬眉白先生之後。先輸百金。首倡斯舉。請之太守歐陽公。公曰善。值郝侯以迎刃材。由肥鄉繁移吾邑。甫下車。軫念民艱。銳意修復。時天亢旱。麥苗漸槁。方憂甚。此一役也。聞之喜甚。迺於三月初九日。請啓隄土。紅幣金錢。重加獎犒。又捐俸錢四十。鑲爲助。父老童稚。環觀如堵。翕翕然膝下之依。旨否

之膏矣。躬親勸課。釃酒祝河。爰歌滿庭芳一闋。暢痾瘵一體之懷。曰。趁曲隨灣。因高就下。生成一派膏泉。天公不應求地不求天。況有仁人義舉。開畚鍤。廣布金錢。對清流。一時喜笑。此處可豐年。視罷迴羸馬。沙迷舊路。何日新田。還求取霖雨。天地同憐。多少停耕待耨。兵火裏。饑饉催殘。遙望斷千村。萬落教我淚潛。潛嗟乎。饑溺刺懷。情見乎詞矣。衆心咸奮。按畝趨工。杵聲震野。風雨弗輟。抵四月八日告竣矣。侯由濟民之意。而充拓之。錫以嘉名曰廣濟。落成之日。土人索予一言。載貞砥。予喟然歎曰。救荒無奇策。自古記之矣。千百年未有之凶歲。尙有子遺哉。民之所利而利之。宜尼扶其義曰。蓋一字丹。千金劑也。昔高宗之命傅說曰。若大旱汝作霖雨。後人爲之解曰。霖雨。是蛟龍之靈也。何能作。蓋桔槔製而抱甕息。井泉通而糞滓棄。人爲之能。信足以奪天工之巧。矧箕星之精。謂不足以彌旱魃之虐也。歟哉。先民有言。洵不誣已。濟民闡依乎溢。廣濟闡依乎濟民。所謂因也。侯家視邑。子視民。以因爲創。以地補天。辦此血忱。用回天賜。若灑撫摩之淚。照流亡之屋。殫厥心矣。功其懋也。詩曰。泂酌彼行潦。挹彼注茲。侯其有焉。碑陰蟲蝨。尸祝聿新。視往詰之猷。伐亭亭更不朽矣。賴異日霖雨天下。有如此河。歐陽公諱主生。號惺菴。江西廬陵人。甲戌科進士。郝侯諱綱。號賁如。山東齊河縣人。丁丑科進士。崇禎十四年辛巳夏四月吉日。

臨洛驛馬政記

我朝自定鼎燕都。遐荒通貢。西南絡繹。盡取道於臨洛。爰設驛站。派永年馬十八匹。成安一匹一分。肥鄉二匹三分。曲周八匹五分。廣平三匹六分。雞澤一匹。威縣七分。清河七分。開州十四匹三分。合計五十四匹。

各有差。編定各處里甲。輪流喂養。民蓋久苦難支矣。萬歷初年。郡守蔣公獨加軫念。力爲變通。酌議每匹工料額銀一百四十兩。著派定州縣。各按匹數。編入條鞭。炤畝均徵。募里民諳驛事。習馬性者。支領應役。從前僉派里甲之害。遵旨禁約。於是驛有供應。農無奔馳。積年喂養之苦。一朝頓息。真不易之良法也。無奈羽書旁午。當事者。迫於度支告匱。遂議節省。勘合馬牌。每匹裁銀三十四兩。扣留解部。以濟燃眉。酌工料之有餘。補經費之不足。不過爲一時權宜計。豈知郵符之裁革。僅十分之一。工料之裁減。幾十分之三。較之常數。已不相敷。兼以時方多故。差役倍增。年穀不登。豆芻騰貴。顧欲以裁去之銀兩。辦極貴之草料。應極煩之差徭。甯可得乎。迨夫募夫多逋矣。驛站幾倒矣。乃議僉報輪應。蹈萬歷以前之夙弊。復任其恣情扳累。橫索包賠。剝閭縣之膏脂。填難厭之豁壑。究使民生日蹙。驛害愈滋。吁亦無策甚矣。光山程公世昌。來守茲郡。洞知斯害。急同邑侯宋公祖乙。關會畿郡各屬。力請道院。諄復詳懇。兩院報可。會稿代題。十一年二月。兵部奉旨覆奏。咨行院道府。確議通行。時縣議得臨洺驛。雖設自永。實非永私驛也。天下咽喉。永實當其地耳。當日裁則俱裁。今日復則俱復。則夫加添工料。不得謂永急而各縣可緩。爰計馬匹。每年量加錢六萬八千六百四十文。分派各屬。各炤馬數。按地均攤。卽原額編派。係外府所屬。不便催提者。仍分各縣代徵。以足前數。炤舊召募。應付往來。務令種地者出錢。應募者出力。僉報之衆。散而歸農。如永年額馬十八匹。共該添錢一百二十三萬五千五百二十文。代他府添錢二十四萬二千三十二文。共該添錢一百四十七萬七千五百五十二文。按地冊載地。九千七百六十三頃八畝零。除優免二千六百七十



七頃六十二畝零。餘行差寄莊兩項。共七千九十六頃八畝零。通行加派。炤前馬數。每畝該徵錢二文零。八釐五毫零。他縣徵數類是。至徵發之規。貯收之所。官雖不啓其封緘。仍著嚴司其筭。俟徵完日。與原工料銀一百零六兩。併依期給領。不使吏胥有那借侵漁等弊。兩公之所以媿美蔣公者。不既宏且遠哉。然兩公甯不欲以驛還驛。以民還民。兩相安於無事。惟是扣裁。不可返諸司農矣。舊額不能充夫工料矣。遲廻卻顧。計無復之。姑爲是議。以救目前之急耳。不然。二文零八釐之派。豈遽加諸民哉。後之蒞我洛者。守兩公之成法。諒兩公之苦心。當兵戈既息。財用少充。速爲變通。使扣裁歸諸驛。加派豁諸民。驛民兩不稱累。善矣。尤當清察弊竇。嚴絕濫支。勿藉言僉派爲往例。踵而復僉。亦勿藉言加派爲救時。從而又派。庶飛差永脫。薄斂易完。民之受利於今者。可無虞於後矣。余於茲不能無深望云。

侯生傳

余曩自儀封調杞令。未幾寇大至。維時杞城短垣耳。又傾圯。中土習於治平久。目不辨戈櫓。寇數萬。肉薄環攻。一晝夜。賴紳士奮同心力。城以獲全。其時侯生之翰之力爲多。生名柱明。杞庠士也。素慷慨。明於忠孝大義。家世通顯。不以貲財自擁。濟人之急。貧交待以舉火者無算。或稱貸積十百。往往折券去。凶年散穀。全活及於鄰封。於是邑中號爲長者。城守之役。捐貲募敢死士。與予同擐甲提弓劍。手放火礮。立矢石烈焰中。寇登陴。率斬墮城下。僕陳良。中流矢立斃。生不爲動。比寇退。議修築爲久遠計。慨然出精鏐數十百。屹屹成金湯。生實首倡焉。丁丑予內召爲銓部郎。壬午城遂陷。予慟念舊遊。南望雪涕。已而問侯生者。

安在。杞人曰：烈烈死矣！先是賊帥圍大梁，諸郡邑望風解散。杞無固志，稍稍潛出走。生憤甚，振袂裂背曰：吾祖若父世居此，一旦舍去，獨以存亡遺邑大夫哉！且俱去，城勢無完理。是我自陷耳。率衆固守，然竟不支。城破，身被數創以死。嗚呼！此可謂識去就者矣。今中原破裂，無完土。寇焰如燎原，雖守令之責，乃其居民豪傑，多爲三窟計。志已貳矣。君誰與守？使人人如侯生，天下事尙可爲也。侯氏其先潁州人，徙杞八世，而傳大參公。應徵以直介有聲於時，是爲生王父。父承芳，母口氏。生敦樸好學，問積書甲於中州，皆手自讐校。十上省試不錄，晚廢去。以詩酒自娛，配翟氏，子三，延禧、延祜、延祐，皆諸生，能世其業。

考功氏曰：杞蓋有鼎元劉湛。陸先生云：先生明絕學，以綱常振末俗，居平豔稱忠孝事，鄉人聞之熟矣。故多感慕，礪名節。而侯生以忠死，侯生一布衣士，可以不死者，見夫忍恥圖苟活，夙痛心焉。志所不能堪，奚必有士哉！然使若人不一用其志，徒以布衣死里閭中，則又世道之可慨也已。

### 永年縣志序

永附郡無專志，志肇於東平宋侯。

諱祖乙，東平州人。進士，崇禎八年任。

至齊河郝侯。

諱綱，山東齊河人。進士，崇禎十三年任。

下車之日，乃告

竣。三載政成，芳猷烜焯，立功立言，具足不朽。宋侯有造吾永，於志已見一斑矣。郝侯調永之始，由肥鄉調永。關心民瘼，銳意興除，倡毀橫闢之議，而萬姓之積憤抒矣。首建廣濟之閘，而千畝之美利溥矣。緩米豆之徵，子遺續命之膏也。申災疫之請，流亡照屋之燭也。練兵固圉，督奸禦侮，禮賢造士，賑孳恤孤，善政鱗鱗，不勝紀載。士民擬續收新績，用成完乘，而郝侯則謙謝不遑曰：舊尹之政，弗敢掠也。舊政之美，亦可宗也。抑

抑之度。遜膚不居。則又浩浩乎沂河漢之無極矣。姑紀其略。以俟後來。

讀史摘要序

二十一史。史繁矣。廢寢食。窮歲月。讀未必竟。卽竟矣。亦未必記憶也。多亦奚爲。予甚苦之。偶繙全帙。摘數條。付涵兒鈔錄。壽厥梓。俾讀史者。心眼爽然。曰。某人必傳。某事必不朽。某議論孤行於上下古今。必不可磨蝕。詩三百。一言以蔽之。曰。思無邪。矧茲八十三條。何必不蔽二十一史也。始漢終宋。邈遠之與。冗蕪。槩刪焉。曰。總以存其要者云爾。

鄭儀之制藝序

吾社諸兄弟。皆一時英雋也。其間尤超越者。推儀之爲白眉。儀之鍾兩間之秀。夙具靈根。而精神所嚮往。又復津津好古。家之塾。一小閣。讀書其中。涼夜篝燈。長吟不輟。亦忘其戶外之參橫月落也。造詣日邃。文藝日工。每搦管。妙緒元機。霏霏滿楮。而隻字片語。直將吞吐千秋。夙絕一世。以故屢試有司。輒哀然冠多士。衡文者無不賞爲青錢選。乃辛酉之役。竟致造物所尼。歸來益奮志下帷。掩扉謝客。三年間。聲色貨味。灑然不染於衷。而一片苦心。刻刻與經史相印合。其下筆。更嘔肝吐膽。領異標新。凡考究筌蹄。斤斤務元。惟求會心而後止。今秋北上。果脫穎而出。蓋文章信有定價耳。儀之王父。爲名太守。尊公由儒彥。皆成均。儀之家學淵源。克繩祖武。明春射策。應奪傳臚首唱。鄭之閱閱。虻看隆隆再振。其同社諸兄弟。不相與彈冠稱慶哉。

和丸齋新藝自序

子做秀才僅八月。爲孝廉。竟十年。刊和丸草。在秀才英發時也。人爭羨之。刊公車稿。在孝廉踴躍時也。人幾厭之。今春之役。幸捷南宮。偶走長安書肆中。見有懸和丸草者。閱之不覺失笑曰。花樣不新。那堪入眼。三年前之公車稿。已敝帚矣。又安有十年塵土之和丸草哉。梓人索近稿不已。爰簡奚囊。聊搜數藝。敢云不失故吾。亦曰微蠶腐案云爾。羨與厭。又奚暇問世耶。

孔氏家志後序

邵子曰。仲尼以萬世爲士。故帝王師相。代有消歇。而素王一綫。卽雜霸之閔。統諸子百家之曲學。罔不奉爲斯文鼻祖。無敢祧焉者。豈仲尼不朽於人心哉。人心各鏤一仲尼譜也。闕里孔祀。代有闡揚。而甯儀一系。與浙衢并荷異數。我國家崇禮師儒。典綦渥。制綦周哉。小子縮綬浚儀。日與襲封國學翰之孔君。指點先侯。舊封遺壤。斷碣殘碑。莊誦甯儀家志。乃知孔氏之堯而甯也。自武德始也。山東頻難。貞觀爲保全。聖裔計。而封褒聖於宋故墟。蓋微子始封在焉。其甯而闕里也。自元和始也。閱五世東土。旣平。惟陞有歸。竟議而留。惟一於楮垆原。蓋褒聖丘壠在焉。其甯而轉徙儀也。自至元始也。水災遷徙。世祖有文學詔。而授孔秀爲儀封簿。官而附籍。蓋亦曰先聖振鐸之所在焉。且展卷而仁義道德之英爽宛然。展卷而六十四代之血脈井然。展卷而累朝之殊恩隆遇。勅制命誥。犁然。展卷而昔人之奏疏。文移。碑銘。序誌。秩然。典而核。詳而有則。雖家乘。洵信史哉。昔夫子言夏殷之禮。而致慨於文獻無徵。今日者。國學君與數十子。袷

輩英英振起而獻足矣。甯儀一誌與孝思錄英葉集諸篇並傳而文足矣。足則能徵。徵則悠遠。子子孫孫勿替引之。故宜與闕里大宗並弗墜於萬萬世哉。小子讀聖人之書。食聖人之報。蒞聖人之土。而交聖人之雲。祗獨親攷聖人之譜牒。獨悉倘亦沐聖人之教澤。獨奇而獨深者乎。烏能無一言綴簡末。

贈文林郎杞縣知縣先考阜岩府君行狀

先君見背時不孝甫六齡耳。先君音容色笑。僅可追摹彷彿。而微言懿行。恨不能記憶什之二三也。卽家慈亦不過撫舉一二往事。先君隱德善韜晦。舉動不令室人知。前休湮沒。終天之恨也。慟哉。謹掩淚而強撮其大都。先曾祖諱緒。仕徐州倉大使。精書算。持大體。懷懷盡厥職。先祖諱羽。邑庠生。風流儻侷。不事家人產。雖環堵蕭然。而處之裕如。尤曉通音律。縱放詩酒。爲儕輩推重焉。先祖生二子。長諱倬。次卽先君諱化。號阜岩。蚤年失怙。檠檠靡所依。稍長。就外塾。從里中先生遊。性聰慧。過目成誦。因家事蕭乏。束修艱窘。慨然曰。吾母春秋高。而吾受書於外。何以承菽水歡。讀書欲何爲。遂輟業焉。乃躬貿易以自給。與兄倬竭力事母。互相友愛。宗族鄉黨無間言。次妹尙幼。恩勤撫之。時家徒壁立。僅能存活。而母子兄妹之間。太和平常自盎然。兄先故遺孤女一甫。八月。先君鞠育。踰於己出。萬苦千辛。無間寒暑晝夜。長成爲之婚嫁。稱貸辦糗匱。時人義之。長妹適王。貧而有子。先君召其仲子。養之者數年。不幸夭折。又召其季子。養之爲己子。爲之娶婦。訓以生理。先君故未幾而季亦殂。次妹適杜。杜世宦而家饒裕。先君與之偕力供母。若愛若誠。無所不至。母疾篤。一切後事。各矢心自致。且語妹云。妹以饒於力。故平時奉母。吾不能先而讓妹。今母

將辭世。此際所最重者棺槨耳。人子畢世之忱。具在於此。於此虛擲。永無自致之期矣。吾當獨力營之。不能讓妹也。傾其所有。備極堅美焉。父母歿後。數十年間。追遠之誠。無一息懈。而塋在臨洺鎮西。距郡城七十里許。乃於生辰忌日。歲時伏臘。或策蹇。或徒步。畢竟一往。往則栽灌墓木。焚燒紙錢。輒流涕不能語。墳東南買地二十畝。歲輸正賦。尤宗屬中所不肯爲者。先君雖未深習經書。而於上下古今。理亂興衰之故。無不了了胸中。稗官小紀。野史外傳。尤能抵掌而談。鑿鑿不爽。至其真醇。豈弟。絕無近世機變之習。而復介潔公耿。不伎不求。自少至長。絕不見一暴厲之容。憤怒之語。雖性極恬和。而亦不受侮玩。時一几獨坐。嬉嬉怡怡。而肆中老少環立。不命之坐。不敢坐。里中少年儼佻成風。一見先君。卽爲斂跡。凡所爲不善狀。甯受官司。扑責。不欲聞於先君。有李姓者。中邪祟。病瘋狂。披髮跳叫。動以瓦石擊人。人不敢近。一見先君。便伏地痛哭。尤異事也。先君性嗜酒。微醺卽止。不及亂。恬泊自持。遇貴介卽引避。從不一揖。同邑薦紳。半屬瓜葛。竟年不一面也。時族屬鼎盛。甲第蟬聯。兄輩崧岩開府雲中。紫岩掌禮垣。明岩汝南別駕。友石守莒州。石岩令息縣。恆岩鑑庵俱孝廉。極一時之盛。而先君從不出諸口。曰。簪紳自簪紳。韋布自韋布也。吾何有焉。元旦拜晤之外。足跡不一至其門。崧岩伯笑曰。三門二弟。倔強猶昔。具酒強招之。竟日穆如也。先是崧岩僉憲磁州。先君貿易入其疆。同行者私語於人曰。此司道弟也。先君聞之。急命返棹。詢其故曰。吾兄爲此地風憲官。而我以一介布衣。爲人物色。豈不貽地方累。問者歎服而退。肆中偶被盜。火甲夜執之。走告先君。至中途問其狀。曰。鄰人之婦也。先君云。我去而婦被執。定當鳴之官。此婦何以見若夫。非梁上

纒卽井中泥矣。其速釋去。但曰申某未之知可也。一夕坐月下。見壁側有螢火光。家人掘其地。內埋瓷礫。覆以蓋。中若有物者。先君曰。吾薄福人也。得之不祥。其掩之。嗟乎。釋盜不問。有陳太邱之風焉。揮金不顧。有管幼安之誼焉。先君豈可於今人中求之哉。先君中年無子。得一女如掌中珠。先所育伯氏女適高姓。高固市井僧。而伯氏女尤險毒而深刻。反視先君親女爲駢拇。指日夜謀所以陰傷之。侍婢爲之不平。先君曰。吾女有我在。吾兄亡。遺此弱息。安可與較。或者撫育未至乎。不然。何人情相遠甚也。恩養愛恤。始終不替。先君慷慨好施。予逢僧則飯。遇乞則哺。鰥寡孤獨。顛連困苦之人。量力之所至。俱爲助給。而修橋煮粥糜。無不殫厥心力而爲之。獨不好浮圖。曰。其外道也。將焉用此。由是年彌高。德彌邵。盛德之名。達於遠邇。內而本宗。外而戚屬。以及鄰交市肆之夫。咸以真實之心。結納之。以樂易之風。嚙拂之。故貴賤賢愚。尊卑大小。無不親愛敬慕焉。生平與世無爭競。從未屈膝於公庭。鄉飲大典。邑侯敦請。遜謝者久之。曰。我何人斯。而煩子大夫折節。甯不貽羞樽俎。堅辭之事。遂寢行年六十無子。而女子歸後旋殂。殂之前三日。閉目不食。所談俱因果事。若乞憐於司命者之前。曰。吾願往事。但如吾父何。久之。隨輓然喜曰。佳兒佳兒。吾費力如斯。乃獲有此。父其抱之而歸。吾去矣。左右皆聞之。乃渣然長逝。越數年後而不孝生。先君時年六十四矣。先君喜不孝之生也。終不能忘情於女。痛惋殊甚。竟日鬱然。閉門灌溉花卉。調養魚鳥。以寄寫無聊。越六年無疾而終。終之日。家慈詢後事。曰。吾平生無一善狀。但內省此心。仰不愧天。俯不愧人。暗室不愧衾影。晚年得子。或者其克昌乎。且叮嚀家慈曰。勿以婦人之見。姑息養驕。俾此兒貽玷家譜也。又何言。

又何言。卒之日。陰雲四合。霪雨如霰。雖遠近之人聞之。無不拊心頓足。揮淚失聲。而里中耆舊。猶於數十年後。稱頌咨嗟。津津不去口。先君生於嘉靖十八年九月二十二日。卒於萬曆三十五年正月二十四日。得壽七十。距今二十八年矣。不孝舉孝廉。便欲請銘隧石。而鈍材蹇吻。每一搦管。輒泣下霑襟。弗能措一詞。今日成進士。作令三年。邀茲恩典。榮及所生。爰因兄靈允。譜輯先君小傳成。而又細詢家慈。兼憶平昔得之叔兄。睹聞者。雜陳錯纂。而不備不文。竟未悉先君休美之萬一也。則不孝終天之恨。亦終天之罪耳。

申氏家譜跋

吾族舊矣。譜未梓。闕事耳。鄒縣兄笥中獲一藁。藏十年。茲付梓。弁以贈考功府君。引言附王太史。張孝廉兩傳。表厥熾。誌不忘也。世系圖闕。像贊闕。九世十世宗支闕。山瑩圖闕。誥勅碑銘行狀闕。外傳闕。闕不一。譜雖梓。猶闕事耳。有補闕備熾。儼然全乘焉。期以異日。崇禎十三年歲次庚辰閏正月。九世孫佳允。題於司功公署。





# 申端愍公集卷末

明史本傳

申佳允字孔嘉。永年人。崇禎四年進士。授儀封知縣。縣故多盜。允嚴保甲法。盜無所容。霪雨河決。艤舟怒濤中。塞其口。摘大猾寘之法。以才調杞縣。八年。賊掃地。王率萬人來攻城。土垣多圯。允募死士擊走賊。因甃其城。唐王聿鍵勤王將抵開封。諸大吏惴恐集議曰。留之不聽。行守土者且得罪。允曰。惟周王可留之。衆稱善。用其計。治行卓異。擢吏部文選主事。上備邊五策。進考功員外郎。佐京祭。大學士薛國觀傾少詹事。文安之。安之。佳允座主也。事連佳允。左遷南京國子博士。久之。遷大理評事。進太僕丞。閱馬近畿。聞李自成破居庸。歎曰。京師不守矣。君父有難。焉逃死。馳入都。遍謁大臣。爲畫戰守策。皆不省。貽子涵光等書曰。行己曰義。順數曰命。義不可背也。命不可違也。天下事莫不壞于貪生而畏死。死于疾。死于利。死于刑。死于房幃。死于戰鬪。均死也。死數者不死。君父。蓋亦不善用死矣。今日之事。君父之事。死義也。猶命也。我則行之。京師陷。冠帶辭母。策馬至王恭廠。從者請易服以避賊。佳允曰。吾起微賤。食祿十三年。國事至此。敢愛死乎。兩僕環守不去。給之曰。吾不死也。我將擇善地焉。下馬。旁見灌畦巨井。急躍入。僕號呼欲出之。佳允亦呼曰。告太安人。有子作忠臣。勿過傷也。遂死。年四十三。贈太僕少卿。諡節愍。本朝賜諡端愍。

申節愍公傳

華亭陳子龍

申節愍公者。名佳允。字孔嘉。其先晉之屯留人。後東徙永年九世矣。考曰贈考功員外郎阜岩公化。有隱德。公生六歲而孤。家貧特立。無所仰給。母軒太安人。織紉持門戶。日或不再食。而公自童稚時以節操剛正自厲。向人無饑寒之色。人莫測也。十九補博士弟子員。二十舉於鄉。又十年始成進士。拜儀封令。儀封小邑。民謹樸易治。公減省條教。一意休息之。大河界邑中。河以北多劇盜。公修閭黨之政。令民自約束。使奸無所容。又廣置耳目。明設購賞。盜皆出奔。枹鼓罕鳴。民以安堵。邑有大豪張甲。爲姦猾亂治。民家訟獄。慮無不爲軒輊。卽令有所興革。必先與參伍。否則格不行。反持令短長。令遜謝乃已。前後經數令。莫敢問。公至。立按之。罪至死。境內震慄。居一載。大霖雨。河決。公艤舟欲渡。雷雨大作。晦冥不辨。吏民數千人爭叩頭請公登岸。公不聽。親操圭璧。沈白馬。負薪柴。實土石爲撻。若夏屋者。以十數。塞決口。水爲之卻。隄以立。成滿三載。舉治劇。徙杞令。杞壤大而俗侈。公清嚴自持。造謁不行。廚傳蕭然。無魚脯之饋。會是時雍豫諸盜大起。有號掃地王者。率精賊萬人。環攻杞。一晝夜。公戎服登陴禦之。手劍斬賊渠。傷指不退。夜出奇兵。奮擊賊。賊敗去。公聚父老謀曰。賊雖退。爾城短垣耳。不足以任樓櫓。鳩工庀材。易以埏埴。三月告成。民不知役。以治行尤異。擢吏部文選司主事。方先皇帝時。懲貪法嚴。而士大夫營殖不少衰。銓司爲尤甚。雖局戶深居。而外相通。關廣開阡陌。公廉直介立。非其人不與交。退食燕坐。精誦竟日。人莫敢請問。衡量人物。剖別邪正。斷斷如也。會邊事急。公條上便宜數端。上皆優詔答之。久之。轉考功員外郎。當大計吏。公爲協理。貶黜無所迴避。罔不審當。仕路爲清。而權貴弗善也。韓城方柄國。排斥善類。不遺餘力。公之師文先生

與韓城有郗。中以徵法。并及公。公上書太宰。言文先生清端。蜚語無左驗。願身獨爲師。受嚴譴。不聽。降南京國子博士。研洞經學。於毛詩論語多所發明。韓城敗。諸正士稍稍召還。公遷大理評事。又一年。遷太僕寺丞。甲申。以牧事出巡近畿。聞賊薄居庸。分兵自常山入。畿南郡縣望風奔潰。或勸公京師危在旦暮。公幸在外。可徐圖進止。勿與其難。公奮袂流涕曰。我固知京師必不守。我君在焉。安危共之。何所逃避。遂策馬至都城。時三月十二日也。門扃者一旬矣。卽入徧謁諸大臣。畫戰守之策甚悉。俱不省。公貽其子涵光書曰。行己曰義。順數曰命。義不可背。命不可違。吾受國重恩。誓以死報。時儕輩或問公有變。薙髮可免。公曰。是倖活也。不可曰。庶幾得當以報漢可乎。公曰。此亦藉口耳。能則任爲之。十八日。聚賓客爲仲子行冠禮。曰。昔人所謂冠帶見先人於地下也。十九日。城破。左右請易服匿他所。公笑曰。我此來何爲者。苟避也。無甯不入。我以孤童隨老母起微賤。主上不以爲不肖。食祿十有三年。國家事至此。何所復顧。獨念太安人年老逢難。長背罔極。然辱身以辱親。不孝滋大。我志決矣。顧視兩僕。固守不去。給之曰。我自擇善地。至王公廠。有灌畦巨井焉。兩僕知公意。急挽公。公裂袖躍入。兩僕呼號。垂綆救之。公在下呼曰。汝等歸慰太安人。君亡與亡。有子作忠臣。毋過戚也。遂沒。時年四十有三。公性儉素。雖歷華要。不營生產。居處甚薄。與人交。平易無崖岸。而中實耿介。嗜讀書。非公事。手不離緗素。於詩好稱李崆峒。何大復云。子涵光。涵煜。涵盼。皆世其業。涵光才尤高。工文章。

陳子曰。記曰。儒有見死不更其守者。平時蒙臚仕。享鼎食。見國將危。擇地而蹈。越境乃免。君臣之義。何其

薄哉。古之志士。可以不死而必死。恥微倖也。是故申蒯遂齊斷左臂。宏演還衛。肝用剖。越甲一鳴。雍門死。莒穆遇難。厲附殉。彼如不死。固無繩焉。申公出次在郊。入國赴難。可謂忠矣。詩云。彼其之子。舍命不渝。其公之謂與。

年譜

萬曆三十年壬寅。閏二月二十九日寅時。公生。

我申亦山西屯留人。元末避亂徙居絳縣。二世祖諱庸。明初赴山東掖縣令。道經永年。得吉壤。因遷始祖諱文美。槲。葬聰明山之西。今祖塋是也。是爲永年申氏。始初居石碑口村。後仕宦者多。乃入郡城。三世祖諱達。以人才仕至汝甯府知府。加布政司參政。四世祖諱甯。舉賢良方正。徵至京。引疾不仕。以詩書教授里中。號二經先生。五世祖諱廣。靈璧簿。累封奉直大夫。戶部郎中。六世祖諱緒。徐州倉使。兄綸。登宏治乙丑科進士。仕至雲南副使。七世祖諱羽。庠生。高才不羈。家遂中落。八世阜岩公諱化。卽先大父。以家貧不竟學。娶於邢。暨軒時諸從兄弟。佐爲都御史。巡撫大同。价。禮科左給事中。偉。汝甯府通判。僑。知息縣。中清。守莒州儲。中道。俱舉人。一方推鼎盛。公獨落落剛介。自守事母孝。好施多隱德。初艱於嗣。一女適路氏。一旦病且死。忽閉目自語。我固願往。奈吾父無子。何已而笑曰。嘉兒嘉兒。好將去。未幾。祖母軒生公。先大父年六十四矣。人以爲盛德之報。其後必昌云。

三十一年癸卯。公二歲。

三十二年甲辰公三歲

三十三年乙巳公四歲

三十四年丙午公五歲

三十五年丁未公六歲

三十六年戊申公七歲

正月二十四日先大父卒。時家貧。中外無所倚。祖母紡績以佐饔飧。有時不繼。

三十七年己酉公八歲

三十八年庚戌公九歲

初就外傅。行里巷中。目不旁視。讀書刻勵。不待督責。寒夜一燈。書聲與杼機相答。不夜分不止也。先伯

祖諱俸。無子。一女適高氏。甥皆獷悍無人禮。欺公寡弱。所以陵之者備至。祖母撫公飲泣而已。

三十九年辛亥公十歲

四十年壬子公十一歲

四十一年癸丑公十二歲

四十二年甲寅公十三歲

四十三年乙卯公十四歲

四十四年丙辰。公十五歲。

邢安人卒。

四十五年丁巳。公十六歲。

四十六年戊午。公十七歲。

服闋。冬娶先慈靳安人。外大父草堂翁諱一鶚。富饒多大度。好相人。一見公。奇之。使人道意。遂委禽焉。諸戚皆不悅。曰。翁素貴。此女乃以字貧子耶。翁不聽。

四十七年己未。公十八歲。

十一月三十日丑時。長子涵光生。

泰昌元年庚申。公十九歲。

赴童子試。府冠軍。以第二人補邑庠生。公初從學李端吾先生際盛。長乃從族兄琬學舉業。又從再從兄靈允講性理綱鑑。靈允萬曆乙卯科舉人。琬後亦舉天啟丁卯科。

天啟元年辛酉。公二十歲。

赴通州遺才試。督學御史左公光斗奇其文。拔冠十學。秋以詩經中十八名。房考爲中書舍人光州楊公景明。刻和丸草。遠近爭傳誦之。公性至孝。故齋稿皆以和丸名。志不忘也。

二年壬戌。公二十一歲。

會試下第

三年癸亥。公二十二歲。

四年甲子。公二十三歲。

五年乙丑。公二十四歲。

會試下第。刻公車稿。

六年丙寅。公二十五歲。

與郡中名宿結社。制藝之外。間作詩歌。於是詩名大震。

七年丁卯。公二十六歲。

崇禎元年戊辰。公二十七歲。

會試下第。八月十八日申時。次子涵煜生。公自以連舉進士不第。奮志下帷。築室於滄南韓家屯。屏絕人事。

二年己巳。公二十八歲。

作詠史絕句百首。

三年庚午。公二十九歲。

十二月初一日亥時。長女生。



四年辛未。公三十歲。

成進士。名在三百三十二。廷試三甲九十五。吏命觀政。房考爲侍講文鐵菴先生安之。刻和丸齋并小品二稿。七月筮仕。得河南開封府儀封縣知縣。八月赴任。時中州尙全盛。儀小邑易治。公簡省條教。一切與休息。政聲大著。時進諸生課文藝。自公多暇。里中故舊來者不絕。飲酒賦詩以爲娛。刻君子亭詩集。四書鐸。詩經鐸。行於時。

五年壬申。公三十一歲。

大霖雨。河決。公艤舟怒濤中。冒雨指揮。決口隨塞。邑人得免漂沒。邑有巨猾張姓者。武斷爲鄉曲蠹。凡諸興革。必先關白。乃以告令。令不當意。則以他事中傷之。公聲其罪。置於法。邑人大稱快。邑東鄰曹濮。稱盜藪。公嚴閭黨之政。使奸無所容。盜皆奔出境。

六年癸酉。公三十二歲。

分較豫闈。得范廷茂等五人。冬兼署杞縣事。杞令入覲中道返。公在杞未幾。政教大孚。及杞令行。取去士民請於諸上官。願得公爲令。

七年甲戌。公三十三歲。

臺使者以公才堪治劇。特章薦之。冬調杞縣。杞巖邑。號難治。公鎮之以嚴。聽斷明敏。人人斂服。方署事時。劉公理順尙爲舉人。公重其守。事事咨訪之。交相得也。是歲劉公中鼎元。

八年乙亥公三十四歲。

正月流賊號掃地王者率衆數萬餘突至時承平久民不知兵杞城土垣多傾圮跛羊可上公率士民登陣死守賊肉薄環攻百道俱進公調度有方親督戰手馘怯卒懸金募死士無不人人奮勇多所斬獲賊奪氣遁去杞城廣九里許是夜公徒步巡城幾十週趾甲爲脫賊退進紳士爲久遠計大築城易土爲磚石三月告成民不知役至今屹然如金湯詳載杞志是歲考滿贈大父如公官祖母邢贈孺人軒封太孺人先慈封孺人子涵光娶婦盧氏甲子科舉人愜允公女也。

九年丙子公三十五歲。

復分較豫闡閱易經得李兆民等六人偶閱書經房得一卷甚奇以示主者首薦之乃商邱吳伯裔名士也故吳終身執弟子禮方入闈時唐藩越境將赴都臺使者大恐集諸公議曰留之不聽行則守土者且得罪奈何公曰惟周藩能留之他人無能爲也臺使者大喜如公指唐藩遂止不得發。

十年丁丑公三十六歲。

入覲舉卓異陞吏部文選司主事益自恪謹門無雜賓苞苴槩擯不得入日袖短帙咨詢人材有所聞卽手疏之秘不示人每主者問及言其人顛末甚悉主者嘉嘆詩有春明集。

十一年戊寅公三十七歲。

上疏陳太孺人孀節狀得俞旨建坊旌表九月十五日寅時季子涵盼生考取保舉首拔貴池劉伯宗。

城爲知州。江南正人領袖也。冬上備邊五事。俱下部議行。時朝臣多固黨與。鮮中立者。公嶄然無所偏倚。嘗曰。人臣一著依附。便是私。小人勿論矣。卽依附君子亦不可。

十二年己卯。公三十八歲。

爲次子涵煜聘婦李氏。湖廣道御史春蓁公女也。

十三年庚辰。公三十九歲。

陞考功司員外郎。覃恩再贈大父如公官。邢孺人贈安人。軒太孺人封太安人。先慈封安人。冬。協理大計。於善類多所護持。羣小不悅。思有以中之矣。計典畢。公見時事日非。作懷歸詩三十章。浩然有去志。時薛韓城當國。抑折正人無遺類。公師文鏡菴先生。與薛素有郗。薛以他事羅織。中文以微法牽連及公。公上書冢宰。言文先生清端有重望。蜚語無左驗。願獨以身受嚴譴。不許。請南。遂改南京國子監博士。八月歸里。角巾野服。與二三老友吟嘯南園。詩有南園集。

十四年辛巳。公四十歲。

八月赴留都。留都人士聞公至。人人欲望顏色。問字者無虛日。時謫南雍者七人。皆賢者。如姚都諫。思孝。王給事之晉。李侍御模。望尤著。公作南雍七子詩。黃石齋先生道周拜杖南旋。與公把臂。極相推重。爲留連數日。乃去。書寓中一聯云。俸薄難供鶴。官閒但種梅。故時自號梅鶴寓人。詩有秣陵集。

十五年壬午。公四十一歲。

給假旋里。時韓城敗。賜死。諸正人稍稍召還。遷公大理寺評事。赴都值警。道梗塞。歸守城。宿城頭者月餘。

十六年癸未。公四十二歲。

春入都。陞太僕寺丞。公在南及家居三載。不以一字通朝貴。諸故舊有欲汲薦者。力止之。時周宜興用事。附之者立致顯要。公爲周辛未所取士。至都不一投謁。一日遇於朝。揖而退。周目送之曰。彼修然者誰耶。或以公對。周恚曰。申君少我耶。焉有門下士令座主不識其面者。或以尤公。公笑不應。未幾。周敗亦賜死。附之者皆驚竄。無敢往哭。公獨哭之如禮。經紀其喪南還。冬嫁女曲周路澤農。漕撫都御史振飛公季子也。范公景文還朝。與公一見爲莫逆。嘗唱和詩。共裝潢爲冊。同人傳和之。詩有後春明集十七年甲申。公四十三歲。

二月以牧事出巡近畿。未幾。聞流寇漸逼京師。所至披靡不守。朝臣或借事出國門。則疾馳去。所親謂公身既在外。可徐圖進止。無及於難。公叱之曰。吾君在焉。安危共之耳。奚避。乃間道抵都門。蓋三月十二日也。門扃者旬餘矣。公入謁當事。畫戰守策。皆不省。知大事已去。時子光奉母及幼子盼居里中。煜尙垂髻。隨祖母在京邸。公遺書與光訣曰。行己曰義。順數曰命。義不可背。命不可違。吾受國重恩。誓以死報。不復顧家矣。儕輩或就問公。脫有變。薙髮可免乎。公曰。是倖活也。不可曰。庶幾得當以報漢。如何。公曰。此亦借口耳。能則任爲之。十八日召賓客與子煜行冠禮曰。昔人謂冠帶見先人於地下。吾以成。

人望子矣。因以所著詩文付煜曰：好藏之。吾無長物。生平精力見於此。是晚飲食如常。爲煜備言齊家立行之道。十九日。聞城破。冠帶拜太安人曰：母勿慮。兒不敢遣母辱。遂騎馬出。時大名成公克鞏爲庶常。鄰居公過之。以老母幼子爲託。曰：恨不得溪流一泓。畢吾事。井太促。殊悶人耳。復騎馬至王公廠。左右請易服避他所。公笑曰：吾此來何爲。苟避也。甯不入矣。國家事至此。豈忍苟活。獨太安人年老逢難。用是拳拳。然辱身以辱親。不孝滋大。吾志決矣。視兩僕固守不去。給之曰：我擇有善地下馬行。有灌畦巨井焉。北向再拜。呼聖明者三。兩僕知公意。急挽公。公奮袖。袖裂。遂投井中。兩僕呼號欲救之。公大聲叱曰：吾誓不生。何救爲。汝等歸慰太安人。君亡與亡。義不能顧母矣。時井水淺及腹。乃坐而沒。京師井皆覆以石。三四竅而小。以防溺者。是井在園中。故口闊。公蓋定志非一日矣。越日昇至寓。笑容如生。兩目炯然。太安人撫哭曰：兒不瞑。爲我耶。作忠臣。母何憾。乃瞑。方家人遶哭時。一人叩門。緇衣杖錫而來。驚視之。公同門友林公蘭友也。哭曰：我知公必死。今果然矣。公視我。豈貪生保妻子者。老父在堂。圖一相見。異日不敢負公也。顧左右曰：設位乎。曰：未也。索筆題明捐軀報國忠臣申公之靈。復題於柩曰：死爲蓋臣。不負君恩於地下。生圖見父。卽就鼎鑊而心安。執煜手曰：姪自愛。從此無見期矣。賊命凡死節者。署狀於門。戒其黨無得入。及賊敗。煜掖太安人出走。備書徐起鳳在寓。賊舉火欲焚。徐哀懇得免。已而移柩天甯寺。六月歸里。八月葬於聰明山西之祖塋。里人私諡之曰：忠貞。建祠祀之。曰：旌忠。公豐軀卓立。望之懷然。喜怒不形於色。小心敬畏。在都凡遇朝期。夜半必起。衣冠坐待。性朴素。不御華美。不營

家人產業。門無豪僕。不權子母錢。不以竿牘求人。無聲色之奉。當爲吏部郎里居。朝夕手一編。門庭闐然耳。詩好李空同及于鱗。春明集以後。專力於杜陵矣。順治九年。上舉封墓典。詞林王公崇簡。都諫魏公裔介列名以上。奉旨再覈。周掌科體觀。張掌科王治復疏請有誤。列公自縊者。魏公特疏辯之。下原籍詳察。督撫與學使者。再上死節狀。奉旨遣禮部侍郎李公爽棠設壇祭於都市。諡端愍。賜田十日。春秋奉祀。國制十日七十畝也。公諱佳允。字孔嘉。一字濬源。海內稱爲素園先生。

男涵光煜謹述

### 行狀

雞澤殷岳

崇禎十七年三月十九日。京師失守。太僕寺寺丞申公死之。公諱佳允。字孔嘉。號素園。其先晉之屯留人。二世祖掖縣公庸。徙永年。子孫聯縣甲第爲邑望族。九世傳贈考功司員外郎阜岩公化。有隱德。配邢氏。贈安人。軒氏封太安人。公。軒出。六歲而孤。家貧。子立。無依倚。太安人紡紝備晨夕。日嘗不再炊。九歲就外傳。端謹如成人。讀書穎慧。淬礪無寒暑。伊唔聲徹夜。與杼機相答也。十九補邑庠。高等。明年辛酉。舉於鄉。公自以起家寒苦。益節儉。斂束力不能致書。從親故借錄。纍纍滿篋。辛未成進士。謁選得儀封。儀小邑。吏民淳樸。一意休息之。大河界邑中。河北素稱盜藪。公連伍勵器。設火礮。獎致健卒。盜懼竄伏。曹濮之間。借以安枕。壬申。霖雨河決。公渡至中流。雷雨暴至。風濤大作。左右相視無人色。公指調閒適。置茨柴石。櫂堰隄立就。邑人得免漂沒。邑張某狡獪舞文。爲鄉曲大蠹。獄訟興革。先關白乃以告令。令不當意。則以他

事中傷之。往令遜謝。惟謹。公至。聲其罪。立置於法。三年大治。調杞。杞。巖邑也。其俗侈。公示之以儉。鎮之以嚴。正衙署肅然。無私牘。諸餽遺請屬俱沮。不得行。乙亥。流寇萬衆。附杞環攻。歷晝夜。飛鏃如雨。公囊鞬佩劍。冒矢石。繞城數十週。拇指爲脫。斬馘纍纍。賊窘遁去。城土基。年久傾圯。跛羊可陟。乃易土爲墉。三月告成。而民不擾。上官檄諸邑。以杞爲法。與邑中父老約。凡錢穀勒取。增羨及吏役虐民者。得鳴金。非時入愬。卽重治無宥。教士以端靜。月有稽。歲徵其業高下。爲刻行之。知名之士。多負笈從公遊。癸酉。丙子。分較豫闈。稱得士。丁丑。入覲。以治行尤異。遷吏部文選司主事。是時苞苴公行。銓曹尤甚。公益緘飭。自署中歸。攤書冥坐。陶然如擁百城。庭幕闕落。座無雜侶。凡遠近人才。邪正廣狹。皆咨訪得其實。以佐主者之不逮。戊寅。上疏陳太安人孀節狀。詔豎坊旌表。是冬。畿輔亂。公敷敷數事。俱優詔答之。庚辰。轉考功司員外郎。協理大計。擊奸扶良。不避權力。公見朝政日非。用倖多側媚。賦懷歸三十章。浩然有去志。是時。薛韓城當國。抑折正人。無遺類。公師文。錢庵先生。與薛有郅。薛文致中以法。并及公。公上書冢宰。言文先生清直。有重望。淵源大義。願代師得嚴譴。不許。乞南。改南京國子監博士。著四書毛詩鏡。闡幽發皇。學士宗尙之。鍾山秦淮之間。屐齒遊舫。咏哦幾徧。已而韓城敗。正人稍稍召還。壬午。陞北京大理寺評事。癸未。陞太僕寺寺丞。浮沈三載。不以一字通輦絨。諸故舊欲汲薦之。則亟止曰。吾母春秋高。得雍容膝下。足矣。蓋公性至孝。太安人偶違和。繞屋徬徨。至廢寢食。顏其居曰和丸。志不忘也。甲申二月。出巡近畿。未幾。聞闖賊漸逼京師。所至披靡。中外震懼。朝臣或藉事引去。左右以公旣在外。可以徐圖進止。因勸公勿入。公奮袂流涕曰。

京師兵力空虛。賊勢已重。脫有不虞。安危與共之義。謂何。乃星馳入都。時三月十二日也。旣入。徧謁當事。爲畫戰守諸策。俱不省。公知大事已去。以書貽子涵。光曰。行己曰義。順數曰命。義不可背。命不可違。吾受國重恩。誓以死報。不復顧家矣。儕輩或就問公。有變。雍髮可免。曰。是倖活也。不可曰。得當以報漢。何如。公曰。此亦借口耳。能則任爲之。十八日。聚賓客爲仲子涵。煜行冠禮。曰。昔人所謂冠帶見先人於地下也。因以平日所著詩文數冊付煜。曰。好收之。吾半生無長物。精力見於此矣。十九日。城破。左右請易服。匿他所。公笑曰。吾此來何爲者。苟避也。勿甯不入。吾幼貧。至不能給衣食。主上不以爲不肖。受祿十有三年。國家事至此。復何所惜。所不瞑目者。吾母辛苦一生。晚遭此禍。然辱身以辱親。不孝之大者也。吾志已決。易服何爲。已而聞宮中有變。仰天呼聖明者三。視兩僕固守不去。給之曰。往。吾擇有善地。至王公廠。有灌畦。巨井焉。兩僕知公意。急挽公。公破袖躍入。井水淺及腹。乃坐飲而絕。時年四十有三也。配靳氏。封安人。子涵光。涵煜。涵盼。公才識通敏。遇事無凝滯。飲冰茹檠。自筮仕。歷顯要。未嘗一日釋諸懷。服食器用簡樸如寒素。謙和退讓。不立崖異。好著書。有君子亭詠史。前後春明。秣陵。南園諸詩。行於世。與人交。穆然飲醕。不合者。陰疏之。未嘗拒以辭色。兩闌試牘。及所刻制藝家言。春容大雅。而矢口不談文字。其自吏部郎里居。角巾野服。與二三故舊。園蔬濁酒。言笑晏然。聞鳥聲。桔槔聲。則忻然有喜。終其身。不營家產。不以竿牘居閒。長吏邑有利弊。則力爭之。務得當。以益桑梓。長君涵光。高才能文章。名稱籍甚。公每切戒之。曰。名之盛。實之薄也。內而不試。乃有成。公歿。里人欽其節。爲建祠以祀之。紳士劉璇等。私諡之曰忠貞。公祀鄉賢。事聞。



金陵。褒卹如例。順治九年。上訪前朝殉君死難諸臣。詞林王公崇簡。諫議魏公喬介。以名上。已而覆覈。諫議周公體觀。張公王治補牘。再陳。時有誤列公於縊死者。都諫魏公喬介。又特疏言巔末。上命詳覈實蹟。特遣禮部侍郎李公爽棠。設壇諭祭於都市。予監。賜田七十畝。春秋供祀。杭人建祠於西湖。與范公景文諸死節者同祀焉。

欽賜祭田記

溧陽馬世俊

古卿大夫之賢者。則祀於鄉社。而後世祀於學宮。其牢醴之費。皆出自朝廷。有司奉行之。而歸其胙於子孫。典至重也。若夫祭於墓。祭於家廟。皆其子孫之事。然古者士無田不祭。而卿大夫有圭田之授。祭法云。以死勤事。則祀之。其祭之在公私者。可勿論。而隆恩異數。必出於朝廷。而始重。蓋所謂激勸之大者也。余嘗考前朝死事之臣。凡千餘人。錄成一書。分十卷。顏曰日心錄。其死於京師者。爲第一卷。申端愍公之死。灼然在天地間。革代之後。朝廷旣遣官致祭。且錫以祭田。使其子孫世世奉祀。公嗣涵光。涵煜。涵盼。皆爲余文章交。而涵盼又與余同爲史官。凡朝廷典故。有關於激勸之大者。史官當書之。於是以祭田之記屬余。余惟古來褒卹忠烈。未有如今日之盛者。苟非其事。有深足感動。豈能荷此榮典乎。天下謂明以科名取士。而卒不得其報。由今觀之。科名未嘗誤國也。西漢之亡。上符命者日數千人。其時文臣莫如揚雄。劉歆。皆爲喪節之事。東漢之亡。人夸舜禹之事。不知節爲何物。唐自僖昭而後。死事無可言者。惟宋理學最盛。而以身殉國者。一息尙存。此志不懈。明以經義取士。而甲申之變。諸文臣從容而蹈君亡與亡之節。世

祖皇帝特行旌忠之典。勅禮臣核其真僞輕重。得死京師者烈烈二十餘人。多出於科名中。而勳胄皆不與。嗚呼。何其盛也。端愍公奉命而出。聞難而旋。有勸公者。公慨然曰。普天同讐。豈可越境乃免乎。公以文章起家。以節義報國。公於是乎不朽矣。余嘗論古來勳伐如蕭曹寇鄧。當時賜田宅無算。至於國除。漸滅無有。郭汾陽有再造之功。當唐之世。已有歌舊宅。今爲寺者。何論易世也。至於忠臣義士。雖千百世之後。而瞻其廟宇。問其墓田。猶有勃然而起敬者。則祭田之錫。豈非激勸之大者乎。記錫田之始。爲順治某年某月日。記田凡若干畝。至於此田之守於某。傳於某。皆可不記。史臣馬世俊曰。義在天地。恩在朝廷。非申氏子孫之私榮也。

### 申端愍公祀田記

新安余維樞

祀有賜田。國家所由。褒忠也。甲申春三月。申公與殉國二十有四臣之列。世祖章皇帝重矜卹之。爰易名而錫之祀田。世稱曠典云。私惟死生視厥義。時地所值。不先後以易志。臣道也。苟節可風。奕世不擇代異。厥施君道也。順治九年十一月十七日。詔下其事於廷。十三年閏五月初二日。申公殉國議定。遂同二十三臣者。特諡端愍。並賜官地七十畝。以肆粢黍。奉蒸嘗。公嗣子涵光等。遂來言曰。永邑故無官地。有命無錫。恐君命委諸草莽。而時薦弗良。尋集議合邑二十八社民庶。義輸五百金。買沃地如數。永爲申氏不潦不旱之供。撫督按學使允言。旣協。諸民庶於是乃悉競奮。納有司罔敢後。未幾報成。然則世有自矢知公之心者。故朝甸公私僉合如是。豈非公之忠節皎皎。宜赫然動人隱哉。公子涵光等又言曰。按會典。凡王

朝有賜勳戚及諸賢祀事異數。例官爲給租。復其家。蠲一切徭役。今優免不行。而申氏自力惟正。猶私祀也。若君惠未彰何。維樞乃申告上憲。冊入其地。停免以須後命。靡得竟襄厥事爲恨。已又念今天子覃恩。思紹述。方孳孳闡幽旌淑。仰副章皇帝鄉者褒忠至意。所加榮厚。夜臺隆施。泉壤者未易涯量。非有司所得臆議也。況端愍公之精爽如在山。可以移。谷可以堙。而忠義必不容泯。俎豆必不少替。百世而後。將必有歎尙無窮者矣。孰謂峴石漢川得專美於昔哉。至於公世出績業。家有乘國有史。皆可考而知。此不備書。

杞縣重建邑侯申端愍公祠堂碑

杞縣丁 敬

古有以循吏書於其傳者乎。曰有。蜀郡以興學書。渤海以彌盜書。膠東以增戶至十萬書。漢以來纔數人耳。未多得也。古有以循吏祀於其土者乎。曰有。詩曰。蔽芾甘棠。勿剪勿伐。召伯所茇。思其人。故愛其樹。而不忍傷也。峴山之碑。尤其慟心千古者歟。不然。畏壘之民。規規然感慕而俎豆之。此庚桑子之所懼而逃去者也。若夫以忠孝廉潔之概。值危急存亡之秋。禦大災。捍大患。起一方之白骨而肉之。不死封疆。終死社稷。炳乎與日月爭光。此固非循吏傳所足書。而俎豆徧天下可也。矧夫身蒞茲土。歌九戩而思繡裳者哉。故明端愍申公是已。公諱佳允。字孔嘉。畿內永年縣人。登崇禎辛未進士。謁選得儀封令。三載調杞。杞壤大而俗侈。公清正自持。請謁不得行。廚傳蕭然。無魚脯之饋。視篆纔兩月。而決獄百餘。皆鞫然愜人心。退無後言。他若行鄉約之禮。嚴逃匿之罰。杜僭靡之風。規條飭戒。皆可爲法。政餘坐公館。進諸生相與講。

授癸酉丙子分較兩關稱得士會是時雍豫郡盜蠓起有號掃地王者率精騎萬人薄城下環攻歷晝夜公戎衣登陴禦之親冒矢石繞數十週拇指爲脫斬馘纍纍賊窘宵遁境以安堵當其時公固以死許封疆矣縣城舊土基年久傾圮不足以任樓櫓賊退公謀於父老易土以磚三月告成而民不擾迄今百雉巋然而無犬吠之警者公之力也公去擢銓曹廉聲籍甚俄忤權貴擠公南雍博士尋召爲大理評事遷太僕寺丞以殉國聞嗚呼公不死於杞而死於國則固社稷之榮而非封疆之藉也天固有以厚置之歟蓋公殉國本末載在家乘及前史者情事宛然而我朝褒忠闡微之鉅典天語叮嚀著於令甲猶赫赫昭人耳目薰沐對之有不禁感極而泣下者已杞於晉唐中葉用武之地也祖述以一旅之衆駐節雍邱幾定中原發憤而死士論惜之張巡爲外黃令能扼安氏父子之衝而以寡制多屢戰屢勝移鎮睢陽城陷身死明季之亂與永嘉天寶何異公與二人均可謂得死所矣獨是二人血食於杞歷有年所而公之祀無聞焉甚非所以嘉循良而報德惠也公治杞後四十年而西川涂公來蒞此土經營措置一皆以公爲法少府朱君劉君與公同里每言公之軼事感慨係之詢於故老縣西舊有公之生祠而兵火湮廢址僅存耳嗟乎豈可使公一日不享於杞耶於是糾令鄉耆募財鳩工卽祠之舊址創以正堂三間繚以方垣塗丹堊安公之靈而伏臘趨走焉誰曰不宜祭法有禦災捍患則祀之公之謂歟公之大節固不借祀而崇卽祀亦不借杞而重有區區之心自以公嘗爲杞驅除患難矣豈勞之於戎馬生郊之日而不能報之於嬉游無事之時也哉且公生爲忠義而歿爲神明他年水旱癘疫其有禱而必應者延庇於杞正未艾

也。是役起於三月二十一日。成於六月二十日。鄉耆王從儉。萬邦英胥勤事。而礪石者段加盈。例得竝書。因係以樂章而俾歌。以祀公曰。忻投身兮重淵。隨龍髯兮上天。揖文謝兮與周旋。盍歸來兮。矚此挺。要巫咸兮歌且舞。把瓊芳兮陳椒糈。神何爲兮夷猶。獨眇眇兮延佇。右迎神鼓淵兮鐘黃。列籍兮華堂。神之降兮影徬徨。緝蕙帶兮曳荷裳。緊遙望兮平原。悵禦寇兮力殫。操長劍兮控鳴弦。天風疾兮日晝寒。神若近兮倏遠。勞我心兮盤桓。右降神神之陟兮帝左右。懷我蒸嘗兮俾富而壽。蕩烽煙兮甯斥堠。遵禮度兮脩觴豆。威明宰兮中心刻鏤。熯以蕭兮酌以酒。自今伊始兮無厥後。右送神